

Oqaasiliortut ataatsimiinnerat

Pingasunngorneq, septembarip 18-ianni 2013, nal. 10.00
Oqaasileriffimmi.

Peqataasut: Carl Chr.Olsen, Eva M.Thomassen, Karl Møller aamma Katti Frederiksen.

Stephen Heilmann angalasussaanini peqqutigalugu peqataannigilaq.

Allatsi: Katti Frederiksen

Oqaluuserisassatut siunnersuutit:

1. Tikilluaqqusineq aamma ilisimatitsissutit.
Siulittaasoq tikilluaqqusivoq Nordisk Sprogmoderanteranilu peqataasimaneq nalunaarutigalugu.
 - a) Oqaasileriffik pillugu paasissutissat-nik atuagaaqqiap naqiterteqqinnissaa pillugu grafikerimik quppersagaaqqamik ilusilersuisussamik pissarsiortariaannanngulernerput CCO-p ilisimatitsissutigaa.
 - b) Ukiortaaminngaanniit Oqaasileriffimmi immikkut sprogteknologiip aningaasalerneqartarnissaanut tunngatillugu Nutserisoqarfik, Naalakkersuiusoqarfik, qarasaasialerisullu ataatsimeeqatigisimanerat siulittaasup ilisimatitsissutigaa. Ilanngullugu Nutserisoqarfimmit Ole Birkip ataatsimeeqatiginissaa eqqaavaa, taakkualu kissaataat nutserisoqarfiit assigiinngitsut oqaatsinik atuinerisa assigiissaarneqarnissaat pillugu suliaqarnissaq eqqartorneqartussanut ilaasussaq oqaatigaa.
2. Kingullermik ataatsimiinnermit imaqarniliap akuerineqarnera.
Taamaatillugu akuerineqarpoq, kukkunerit marlussuit naqqiutigineqareerneranni.
3. Saaffiginnissutit:
 - a) Fartstilladelse kalaallisut

Kingullermik Oqaasiliortut ataatsimiinnerannit saaffiginnittoq siunnersorneqarpoq fartstilladelse kalaallisut angallassisinnaanermut imalt.assartuisinnaanermut akuersissummik taaguuteqartinneqassarsoq, saaffiginnittulli nammineerluni angalasinnaanermut akuersissut piumanerummagu Oqaasiliortuniit nassuiaatigineqassaaq oqaatsit makkua isumaasa imarisaatigut

assigiinngissuteqarnerat:

assartuineq, tassani usit ingerlanneqarnerat pineqartarpoq, angalaneq tassani inuit pineqartarput. Taakkununnga akunnaatsumik taaguummillu siammassinnerulaanngumik Oqaasiliortut siunnersuuteqaqqippit, tassalu **angallassinnaanermut akuersissut**. Angalaneq tassannga allaanerusoq erseqqissarpaat, kinaluunniit angalasinnaammat akuersissuteqaqqaanngikkaluarluni.

b) Direktør for eksterne relationer kalaallisut

Siuliani ataatsimiinnermi siunnersuutaasut saaffiginnittup oqaloqatigineqareerneratigut allanngortinneqarpoq siunnersuut imaalerluni: **attaveqartitsinermut pisortaq**.

c) ERP Enterprice Ressources Planning kalaallisut

Matumani Oqaasileriffimmi suleqatitta ilaata qisuariaateqareerneratigut saaffiginnittoq attavigeqqinneqassaaq sunarpiaq taassuma imarineraa paasiniarlugu. **Atortorissaarutini atuinermi pisariillisaat** pineqarsimappat taamatut atuinnersinnaagaa oqaatigineqassaaq.

d) Naalakkersuisoqarfimmit allakkat ingerlateqqitat kalaallisut oqaatsinik ilinniartitsinermut ilikkarniartarnermullu tunngasoq.

Apeqqut eqqartorneqartussaq pillugu Oqaasiliortut oqaaseqaateqassagunik nassuiaataasumik ersarissaataasumillu allagaqassapput. Siullermik atuartsineq immikkut suliaasaqarfiginngikkippit erseqqissarneqassaaq, taamaattoq kalaallit oqaasii eqqarsaatigalugit ullumikkut ilinniartitsinerup sunik salliutitsinerata atuisitsineratalu paasitinneqartariaqarneri tikkuartorneqassapput. Ilanngullugu ullumikkut inissisimaneq tunngavigalugu erseqqissarneqartariaqarpoq danskit oqaasiisa inissisimaneq, taannami tunngavigalugu allaffissorneq, ilinniartoqarfinni ingerlaatsit allallu ilusilersorneqartarmata.

e) Kultur og samfundshistoriep kalaallisut taaguutaa

Kulturimut taarsiullugu oqaaseq *piorsarsimassuseq* siullermik 1970-ikkut naalerneranni Hans Anthon Lyngemit saqqummiunneqaqqaarpoq. Atorneqaqqaartaleramili ulloq manna tikillugu iluarinnittunik isorinnittunillu qisuariarfigineqartarpoq. Oqaaseq *piorsarsimassuseq* isumasioraanni kulturip isumaqartitaasarneranit allaanerusoq isumaqarpoq. Taamatullu atugaanera nalunaarsimagaluarpalluunniit.

Piorsarneq inuup ataatsip qanoq isikkoqarumassutsiminut iliuusaatut paasineqartarpoq imaluunniit qanoq iliuseqarnikkut suliaqarnikkut pilersitamik.

Oqaasileriffimmi Oqaasiliortut oqaatsit akuerisat oqaatsinit nalunaarsukkanit immikkoorsimatippavut. Oqaatsit akuerisat tassaammata inatsisip piumasagaatai malillugit akuerisat. Taakku tassa kalaallit tamarmik atugassaat, arlaalli nalunaarsukkat akunnattoornaveersaarutitut atugaasutut immaqa taasassaapput.

Oqaatsit akuerisat ippigineqarpata Oqaasiliortut kisimik allangortissinnaavaat.

Taamaattoq oqaatsip *kulturip* qallunaatut taanissaa pinaveersimaniarlugu kalaallisut taaniarlugu *piorsarsimassutsip* taamatut atortarnera tusarsaavoq, kisianni maannamut akuerisanut ilaanngilaq.

Ilisimatusarfimmi immikkoortortat ilaata, aammalu NAPA ilanngullugu taaguutimik iluanni piorsarsimassuseq kulturimut taarsiullugu atorpaat. Taamaattoq matumani saaffiginnissummi danskisut Kultur og Samfundshistorie taassumalu imarisai allat tamaasa eqqarsaatigalugit akunnaatsumik kalaallisut ima taaguusiisoqarsinnaanera Oqaasiliortut siunnersuutigaat: **Kulturit, piorsarsimassutsillu oqaluttuarisaanerannik immikkoortortaq.** Matumani *piorsarsimassuseq* ineriartorsimanermik isumaqartillugu atorneqarpoq, qangaaniilli taaguutaani ilaasoq *inuiaat* ilanngunneqanngilaq taaguutaani oqaatsini allani naatsorsorneqarsinnaareermat (redundanitiummat).

f) GOIA Technical Glossary

Uliamik gasimillu misissuisinnaanermut tunngasuni oqaatsit tuluttut atukulaneqartut kalaallisut taaguusersorneqarsimasut Oqaasileriffimmut nassiunneqartut pillugit Oqaasiliortut ilisimatinneqarput. Taakkunani suliaqartut katersoriarlugit suleqatigiissitamik pilersitseriarluni naggataatigut Oqaasiliortunut nalilertinneqarnissaat akuerineqarnissaallu siunniunneqarpoq.

g) Ordbogilerinermik suliaqarneq pillugu Ilnniusiorfimmillu ataatsimeeqateqarsimaneq pillugu Oqaasiliortut ilisimatitsissutinik apuussiffigineqarput. Maannamiit ordboginik suliaqarnermi Oqaasileriffik Oqaasiliortullu qitiusutut inissisimalissapput siunissami suliat saqqummersartussat retskrivningsordbogitut nalilittut isigineqalersussaassallutik.

h) Underarm-ip kalaallisut taaguutaa tassaalerpoq **perneq**, taanna ikutsip peqinneraniit assak tikillugu taaguutaareerpoq. Ordbog malillugu *assa*t aamma allaqqasooq naqqiutigineqarumaarpoq, taanna saanermut taaguutaamat, tassani saarnup tassani aappaa tassaavoq *amileraq*.

i) Motion kalaallisut ulluinnarni taaguineq naapertorlugu **timip aalanerani**k oqaasertalerneqartarpoq, matumanili saaffiginnissutaasumi taaguummik ujartuisoqarpoq Ernærings- og Motionsrådip taaguutissaanik. Taanna akunnattoorutaanngitsumik siunnersuusiorneqareersimasooq Oqaasiliortunit taperserneqaannassaaq, tassaasooq **Nerisaqarnermut Timigissanermullu Siunnersuisooqatigiit**. Tassani timigissarneq fitnessimut taamaallaat attuumanngitsoq nassuiarneqassaaq, timigissarnerlu timip aalatinneqarneranik isumalittut atorneqarsinnaalluni.

j) Passivt ordforråd aamma aktivt ordforråd kalaallisut

Passivt ordforråd: oqaatsit [ataasiakkaat] ilisarisinnaasat, nammineq atugarinagit.

Aktivt ordforråd: oqaatsit [ataatsikkaat]nammineq atugarisat.

k) Nultolerance

Kalaallisut **akuersaanngivinnermik** oqaasertalerneqarpoq, naak tusagassiorfiit akuersaanngilluinnarnermik oqaatiginiartaraluaaraat. Maannamiit oqaatsit akuerisat allattorsimaffianni allaqqalissaaq **akuersaanngivinneq**.

l) Inuit aqqinut tunngasut immikkut qinnuteqaatit.

Inuit Aqqinik Akuersisartut aalajangigaasa Oqaasiliortunit suliareqqitassatut ingerlateqqinneri.

Henriup/Hendriup kalaallisuunngortinneqarluni allanneqartarnera Intalik iluarinagu danskisut tulluussarniarlugu 't'-mik 'd'-ngortitsiniaalluni qinnuteqartoq Oqaasiliortunit akineqassaaq kalaallisut allattaatsip malittarisasa malinneqartussaananerit tunngavigalugu qinnuteqataa itigartitsissutigineqartoq. Kalaallisut allattaatsip tunngavii oqaatsinut allanut naleqqussarlugit tulluarsarneqarneq ajormata atuisussat namminneq ilikkartussaavaat aqqup qanoq taaneqartassanera. Aqqit allat 'd'-rtallit, soorlu Naduk, taakku qanga kuissutaasimasut kalaallit aqqisut maanna taamatut allallugit kuissutaasinnaanngillat, Amerikamiut qanga

nunatsinniissimasut allassimanerat naapertorlugit pilersuupput.

‘Inuuneq’ atertut qinnutigineqaqqippoq. Inuit Aqqinik Akersisartut sinnerlugit NM-ip akissutaa tunngavigalugu Oqaasiliortut oqaaseq ‘inuuneq’ atertut akuerissallugu tapersernartinngilaat. Siornatigullu isummerneq allanngortinneqarnavianngitsoq aamma erseqqissaatigaat, ilanngullugu danskisut ateq Liv-ip , isumaa værnimut tunngasuusoq taamatut qinnuteqartumut ilanngullugu nassuiaatigineqaannassaaq.

4. Allat

Eqqartorneqartut allat tassaapput oqaatsit isumaasa assigiinnginnerat: *naami* isumaqarmat naagga, *naamik* isumaqarluni soqanngitsoq, peqanngitsoq.

Aappaattut papir kalaallisut qanoq taagorneqartarnera ordboginilu qanoq allaqqanera aamma eqqartorneqarpoq. Pappiara, pappial’a, pappiliaq il.il. pappial’a-nngorneranut nassuiaatigineqarpoq qanga qallunaat siullit ilaatigut Norgemit kingoqqisut /r/ issulittoq /r/ nerilittarmiunngitsoq atugarisimammassuk, soorlu oqarunik Kaal’at. Taasarnanik ilitersuisartut /r/ qulimigut ‘sivitsuummik pusingasumik’ ikkussivigisaq atortarpaat, soorlu ortuupar’i taaniaraanni. Siulittaasup oqaatigaa qulaani naassuiaatit tunngavigalugit qasseersiutinngortinnerani pappiarat-mik allassimasassasut, tamatumani oqalunnikkut atuineq assigiinngisititaartoq paasinarpoq.

Inussiarnersumik inuulluaqqusilluta

Carl Chr. Olsen
Siulittaasoq

Katti Frederiksen
Allatsi